

# Surpraisa a Mistail: «Blau egipzian»

■ (rtr) **Suenter Müstair uss er a Mistail: En la baselgia da s. Pieder a Mistail en la vischnanca d'Alvaschagn han ils istorichers d'art chattà en las picturas muralas il pigment «blau egipzian».** Oriundamain quintavan ins ch'il blau egipzian saja ì en emblidanza enturn il quart tschientaner. Perquai èsi stà ina surpraisa per l'istoricher d'art *Michael Wolf* cur ch'el ha chattà quest pigment vid purtrets che dateschan dal 9avel u 10avel tschientaner.

Il blau egipzian è probablmain il pli vegl pigment creà artificialmain per pudair malegiar sin mirs. Ils Egipzians duvravan quels pigments gia en il terz millenni avant Cristus. La pulvra blava era cumplitgada da producir ed uschia era preziosa. Entras ils Romans è il blau egipzian er vegnì en las Alps.

Chattà quest pigment en la baselgia da Mistail ha *Wolf* cun sia analisa multispectrala. Cun differents glischs, filters e cun in apparat da fotografar dad auta resoluziun po el render vesavilas las materialias e metodas ch'èn vegnidas duvradas per picturar ils purtrets. Quai èn pussaivladads che la tecnica moderna porscha pir uss.

## Betg scriver da nov l'istorgia grischuna

Tenor il protectur da monuments *Simon Berger* laschia il fatg, che quest prezius pigment è vegnì duvrà a Mistail, supponer che persunas ritgas e pussantas hajan dà l'incumbensa da far quests purtrets. Ils purtrets cuvrivan probablmain tut las paraids da la baselgia sco quai ch'i era usit en il temp carolingic. Tant *Berger* sco er *Wolf* supponan ch'ils contacts

da l'incumbensader sajan ids fitg ad aut – u en l'ierarchia da la dinastia carolingica u er en ils circuls dal papa a Roma. L'istorgia grischuna na saja perquai betg da scriver da nov, di *Berger*. I dettia dentant novs aspects ch'enritgeschian ella.

## Il blau egipzian dad ina giada in pau sco pulvra da lavar oz

Il blau egipzian n'era betg mo fitg cumplitgà da producir, mabain duvrava er gronda savida per il diever. El na vegniva betg duvrà sulet per colurar blau, mabain era sco effect, declera *Wolf*. Il blau egipzian vegniva maschadà en autras colurs, uschia per exempel en l'alv. L'effect era il medem sco tar il lavar resti alv ozendi. Là vegn er agiuntà blau en la pulvra per che l'alv glischia pli fitg. Il medem vegniva fatg cun il blau egipzian.



Surpraisa en la baselgia da Mistail: Ils istorichers d'art han chattà il pigment «blau egipzian» en las picturas muralas.